

# Māunu Mai Loimata o 'Apa'ula

Sā iai le uafu o Siāmani, 'i le mea tonu 'ua fai nei ma taunu'uga o pasi, 'i le itu i sisifo o le maketi fou i Apia. Sā nofonofu ai se tamaitiiti i le pito i tai o le uafu, ma lana mātau, 'ona sasau lea o lana 'ofe, ma fa'atalitali, pe 'ai se lupu. O ana māunu, o ūlāvai mai le vai o Loimata i Lalovaea, le vai na māfua i loimata o 'Apa'ula na maligi, 'ina 'ua sau mai Fiti, 'ua liu mauga Vaea.

*Lafō le 'ofē, ma sāusau. Lafō le 'ofē, ma sāusau!*

E iloa lelei atu lava e le tamaitiiti lana mātau, ma lupu o mulimuli ai. Ā tuai ona 'ai se lupu, ona fa'apea lea o le tamaitiiti: Sē lupu, sē 'ai! Tou te lē fia 'a'ai i ūlāvai mai Loimata o 'Apa'ula? 'Ai nei fo'i a toe sasa a'u e lo'u tinā, ona o lo'u lē aogā! 'Ua fiu fo'i si o'u tinā e moe'i'ini mau ona mata, ma tatalo ma isi mātua i lalo o pulu o Leifiifi, 'a 'o fai le su'ega e sā'ili ai ni tamaiti e 'ave fa'asikolasipi i Niu Sila, 'ae 'ou te le'i pasi. Pe 'aiseā na lāvelavea ai i lau o le pulu le tatalo a lo'u tinā, 'ae le'i lāvelavea tatalo a isi tinā, auā na pāsi a lātou tama, ma ō i Niu Sila? 'Ae ui i lea, 'ou te lē popole i ai, o lea 'ou te lē'o fāgota i lalo 'o se pulu, e lēai fo'i ma ni ao o le lagi e ono lāvelavea ai la'u tatalo i le Atua o lupu. Tou te fiu lava i mumusu, 'ae o'o lava 'ina 'outou 'a'ai i a'u māunu ūlāvai, mai Loimata o 'Apa'ula!

*Lafō le 'ofē, ma sāusau! Lafō le 'ofē, ma sāusau!*

Sā tumu le uafu tuai o fa'ae'ēgā va'a i 'āiga o tamaiti sikolasipi o le ā ō e ā'o'oga i Niu Sila. Olo'o tau mai i tai le va'afa'i o le 'Mātua', e 'ave ai pusafa'i, ma ō ai ma tamaiti sikolasipi. Na fa'alogoia e le sāulupu, le pepese o fa'amāvaega i le pese: "Ua So'ona 'Ōli'oli Nei". Na ea a'e le ulu o le tama sāulupu, ma va'ai

aga'i i le uafu tele o so'ona 'ōli'oli ai 'āiga, 'ae lē fia pese ai, auā, e tele mea o le lē alu 'i Niu Sila, 'ae 'ō lenei fo'i e lē'o maua ni i'a o lona faiva.

Na tu'u feanu āga'i i le lagi alāasu o le va'aafi ma āga'i atu va'a i le 'Mātua' o tau mai tai. Na fetāgisi 'āiga ma lialia'i o lātou solosolo, ma lafo lātou 'ula i le sami e fa'atōfā atu ai i ā lātou tamaiti, 'ae fetāgisi fo'i tamaiti ma lafo mai a lātou 'ulā teuila ma 'ulā moso'oi i o lātou 'āiga o tutū atu, ma 'āmatamata ona lē manino lelei atu o lātou fōliga.

'Ua galo i le tama sāulupo lana mātau, ma lona faiva, 'ae ua mātamata ma māfaufau, po o āfea e pepese ai so'u 'āiga i le 'So'ona ' Ōli'oli Nei' 'ona o a'u. Po o āfea e tumu ai lo'u ua i ni 'ula, ma 'ou ti'eti'e i le va'aafi ma lona ālāasu pūsapusa tetele, 'ae fetāgisi lo'u 'āiga ma ni a'u uō, ma lafo atu ni ā lātou 'ula i le sami 'ona o le ālolofa iā te a'u.

Na se'i lava e le 'ava'ava le mātau a le faifaiva, te'i le ali'i mai ona māfaufauga, tu i luga maua atu le pito e tasi o lona 'ie 'ua pa'u, tāofi! 'Ae sisi mai i luga le i'a!

'E le'i toe alu le māfaufau o le sāulupo i Niu Sila, 'ae 'ua fa'atū nei ma tau talatala le i'a muamua o lona faiva. 'Ua fiafia le ali'i! 'Āh! lea 'ua suasua mai le tai, o le 'ā 'āmata ona 'a'ai i'a!

*Lafo le 'ofe, ma sāusau! Lafo le 'ofe, ma sāusau! Lafo le 'ofe, ma sāusau!* 'Ai le lupu, 'ai le 'ava'ava, 'ai le mata'ele'ele, 'ai le gatala, 'ai le malau, 'ai le malauli, 'ai le malie! Sui le tamā'i 'ofe i le 'ofe tele. Tu'u le pito o le uafu 'ae 'ua fāgota i le paopao. Tu'u le paopao 'ae fāgota i le va'aalo. 'Uma le fana tu'u'u i le āloālo 'ae 'ua mata tuā'au. Sui le tūtū i le matāfaga ma sāulupo i le tūtū i le si'uā'au ma lafo le 'ofe i le moana. Sui ulāvai mai Loimata o 'Apa'ula i le fafau o le pā ma le ma'ata'ife'e. Sui le tamā'i tuii'a i le ola fāgota. Sui le ola fāgota i le sasa'a i le liu o le va'a 'ona o le tele naunau o le faiva. A'e mai le faiva fīu i āfifi! 'Ua lololo fo'i ma manogi le vaisū! Fai ma se ōta, e te'a ai le mata'ai. Fa'atau nisi i'a 'ae tufa nisi.

Alu se gāluega ma 'ave ni mea ma'alili, ma ni afi, fai ai se mea'ai i le mā'umaga. Fa'atau i'a, fa'atau talo, tele fo'i le lafu puā'a. Fai le fale fou. Fa'atau le pāsi, fa'atau le loli, fa'atau le taxi. O pāsi

mūmū, ma pāsi lānumoana. O pāsi papa'e, ma pāsi lanumoli. O loli pa'u tetele ma loli pa'u lāiti. O loli pusa sasa'a ma loli e tau asu. Tā le vao ma fa'ato'a le fanua. Tā le vao ma fa'ato'a le fanua. Nofonofu i le fale le tama na sāulupo, ma fa'atonu lana 'aufaigālua, ia fai lelei pāsi, ma loli, ma va'aāfi, ma mea fafaga, ma fa'ato'aga.

'E le'i ā'oga le sāulupo i se ā'oga māualuga, po o se iunivesitē. O lana ā'oga, o le 'ofe ma pu'egāmāunu i Loimata o 'Apa'ula. O lana ā'oga o le mātau o le tai fāna'e, ma le tai pē, o le tai o malau ma gatala, o le tai o fe'e tetele, o le tai fo'i o le 'āfa'āfa loloa. Na te mātauina fo'i si'uā'au ma galu, ma le māsina, ma le taimi e fā'anoa ai i'a. O lana ā'oga, o le fanua, ma le sami, ma le vānimonimo.

E tā le tasi i le pō o le Aso Faraike o pepese fiafia le pātī o le fa'amāvaega.

Na sasala le manogi o le tunu moa, o'u manatua ai loa le tamaitiiti na sāulupo! Na mānaia le 'a'asa o malala o le afi ipu, ma le manogi o le tunu māmoe, 'ae ou manatua ai afi ipu, ma le sasala o i'a tunupa'u, pe 'ā a'e mai se faiva i'ā o tāulele'a i se po i lo mātou nu'u. Na manogi lo'u 'ofu i manogi o māmoe ma moa tunupa'u, ae peisea'i, e ātili ai ona sasala mai i lo'u māfaufau, le manogi o i'a tunupa'u a le tama na sāulupo. Na fai fo'i siva, ma tausuga, 'ae fa'alavelave mai lava le tama sāulupo.

'Ou te o'o i lo'u fale ua tā le 'afa o le tolu i le pō, auā na 'ou toe alu 'ua 'ou mātāmāta i le mea sa i ai le uafu o Siāmani. Pei lava o tu'u mai i o'u luma le uafu! Pei lava o tu'u mai ai le tamaitiiti ma fa'atautau ona vae i le sami, ma fai lana ōlega: Sē lupu, sē 'ai la ta māunu!

E le'i lāvelavea i lau māfiafia o le pulu le tatalo a le tinā o le tama sāulupo, i le taimi o su'ega o ni sikolasipi. Na sao lelei lava, ma alu atu te'a mai le māsina, ma le la, ma fetū, ma le 'au 'āgelu, 'ae o'o i le taunu'uga 'uma o tatalo, 'aumi le tali: e te manuia pe 'ā 'e sāulupo i le uafu o Siāmani!